

Cartë nabëquë'ë San Pablo lu ra Colosenses

Quëquë'ë Pablo cartë
rë' lu ra colosenses

1 Na Pablo nahia poshtë shtë
Cristo Jesús purquë gudili
më na. ²Juntë con bëcha Timoteo
quëquë'a'a cartë rë' lu naná bëzuné
Dios almë shtë rai' con ra bëchi la
sahia narunë cumplir shti'dzë më,
grë të naquërelde guë'dchi Colosas.
Gulë bë'në recibir favurë shtë Dios
nu gulë cuedchí ldu'u të por Dios,
Shtëda'a.

Pablo rna'bë lu Dios por ra
narialdí ldu'i diza'quë

³Siemprë rdë'ë na'a graci lu Dios
naná Shtadë Jesucristo, el quë
narnibë'a lë'ë hia'a. Iurë rna'bë
na'a lu më por lë'ë të, rni'i na'a
dushquilli Dios ⁴purquë bini na'a
lla rialdí ldu'u të shti'dzë Jesucristo
nu bini na'a lla rac shtu'u të bëchi
la sa' të naná rialdí ldu'i diza'quë.
⁵Quërelde të zni purquë rialdí ldu'u
të guëquërelde'nú të Jesucristo
lu gube'e. Esperansë ni na ziquë
tubi tesurë nagutsa'u parë lë'ë
të. Por diza'quë nabini të más
antsë, nané të nasalvar të. Gualdí
ldu'u të diza'quë na verdá. ⁶Lë'ë

diza'quë nabini të rrë'tsin por
guëdubi nezë shtë guë'dchiliu, nu
mënë zia gla'guë rialdí ldu'u rallin.
Diza'quë quëhunin cambi vidë shtë
mënë igual ziquë quëhunë diza'quë
cambi vidë shtë të. Primëre vësë
nabini të shti'dzë Dios, bédë'ë të
cuendë de quë verdá rac shtu'u
më lë'ë të, de quë bë'në më favurë
të gac salvar të. ⁷Bë'në të recibir
diza'quë por Epafras, el quë
nabëlua'a lë'ë të shti'dzë Jesús.
Náhi' muzë shtë hia'a; rac shtu'u
hia'a lë'i'. Quëhúnëll cumplir
siemprë lo quë narac shtu'u Cristo.
⁸Guni'i Epafras lu na'a de quë rac
shtu'u të grë ra shmënë Dios por
amor narne'e Espíritu Santo la'ni
ldu'u të.

⁹Por ni dizdë bini na'a de lë'ë të,
adë bësá'nëdi'i na'a guëni'inú na'a
lu Dios por lë'ë të. Quëgna'bë na'a
lu më de quë guëlua'a më lë'ë të
voluntá shtë më, de quë guëne'e më
llni parë gac bë'a të pë na mal nu
pë naná bien. Quëgna'bë na'a lu më
tsasé të nezë za'quë por pudërë shtë
Espíritu Santo. ¹⁰Quëgna'bë na'a lu
më de quë conductë shtë të gaquin
bien lu Dadë, de quë guëquitë ldu'u
më con lë'ë të, nu de quë gapë të

resultadë lu shchi'ni më, nu de quë cadë dzë gapë të más llni shtë Dios. ¹¹Quëgna'bë na'a lu më gac të mënë fuertë lu shnezë më por mizmë pudërë nanapë më. Llëru'bë na pudërë shtë më. Zni gunë të gan lu cusë mal guëdubi tiempë nu gapë të pacënci nu guëquitë ldu'u të. ¹²Nu rna'bë na'a lu më de quë guëdë'ë të graci lu Dadë Dios purquë lë'ë më bëne'e derechë parë guëdapa'a lugar con los de más mënë santu catë quërelde më lu llni. ¹³Bëlá Dios lë'ë hia'a lu guia'a Satanás catë rnibë'all nu bëzú më lë'ë hia'a catë rnibë'a shini më, Cristo. Náhi' Rëy. Nalé rac shtu'u Dios Padre shini më. ¹⁴Por galguti shtë Jesús naperdunë duldë shtë hia'a. Gudilli më por duldë shtë hia'a lu cruz; iurne' nasalvára'a.

**Rbedchí ldu'u hia'a por
galguti shtë Jesús**

¹⁵Adë chu rnádi'i lu Dios Padre perë bédchini më iurë bédchini Cristo lu gué'dchiliu. Mizmë Dios bëlua'alúhi' lu mënë por Jesucristo naná igual ziquë Dios. Lë'i' nabani más antsë cueshtë gué'dchiliu. ¹⁶Bëcueshtë Cristo grë cusë nananú gube'e nu gué'dchiliu. Grë ra narnibë'a ziquë rëy nu autoridá, grë ra nananú gube'e naná rnibë'a los de más sáhi' bëcueshtë Cristo tantë narná hia'a lúhi', tantë chu rnádi'i lúhi'. Grë cusë nanabani, bëntsa'u Jesús të parë gunë rail' sirvë lu më. ¹⁷Lë'ë Jesús nanú më antsë cueshtë grë ra cusë. Nápëdi'i më fin. Por pudërë shtë më lo quë nanú lu gube'e nu lo quë nanú lu gué'dchiliu, grë cusë lo quë

nanabani u lo quë nanápëdi'i vidë purquë zni gac shtu'u më. Rsë më grë ra cusë ni. ¹⁸Jesucristo na cabësë shtë ra narialdí ldu'i diza'quë, grë ra shmënë më naná rdéa grë lugar; unidë na rail' con lë'ë më. Entrë grë ra naguti, na më primërë; galguti adë bé'nëdi'i gan lúhi'. Nídi'i chu stubi ziquë Jesús; napë më más pudërë quë ra naná rnibë'a. ¹⁹Lë'ë Dadë Dios con grë pudërë nanapë më, gac shtú'ui' cueszénúhi' la'ni shcuerpë Jesucristo. ²⁰Por Jesús gac shtu'u Dios cuedchí ldu'u mieti lu më; gac en paz grë cusë nananú lu gube'e nu lo quë nananú lu gué'dchiliu. Gac shtu'u më gac unidë mënë con lë'ë më por galguti shtë Jesús lu cruz. Bë'në më të gac amigu ra mënë con Dios.

²¹Antsë lë'ë të gac të enemigu shtë Dios. Zitu guquërelde të parë lë'ë më; adë guná zá'quëdi'i të lu më purquë guquërelde të con maldá. ²²Perë iurne' lë'ë të na të amigu shtë Dios por lo quë nabë'në Jesucristo. Por galguti shtë Jesús lu cruz, bëlá më lë'ë të lu cashtigu narunë tucarë gunë të recibir. Rac shtu'u më gunë më presentar lë'ë të lu Dios ziquë mënë santu sin ni tubi cusë mal. Zu të lu më sin adë chu guëdchi'bë demandë cuntrë lë'ë të. ²³Zni gac si talë tsagla'guë tsaldí ldu'u të shti'dzë më nu si talë gac të firmë lu shnezë më. Gulë gac ziquë tubi hiu'u naná rza'a lu guë'ë; adë chu guëazë guétëdi'i lu diza'quë narni'i guëbaninú hia'a lë'ë më. Pues diza'quë ni hia bërë'tsin por guëdubi nezë shtë gué'dchiliu. Hia bini mënë di'dzë ni. Na Pablo nahia muzë shtë Dios; bëshe'ldë

më na ziquë ministrë shtë më parë guadi'dza lu ra mënë.

**Pablo quëhunë sirvë lu
ra shmënë Dios**

²⁴Iurne' rquitë ldua'a entrë ra cusë durë purquë ra cusë durë naquëhuna sufrir, na rahin sufrimientë shtë Jesucristo. Tsalú sufrimientë ni la'ni shcuërpa parë bien shtë ra narialdí ldu'i shti'dzë Dios. Jesús na cabësë shtë ra mënë ni; na rai' grupë shtë shmënë Dios.

²⁵Nahia ministrë shtë më; gudili më na ziquë muzë shtë më parë gac bë'a të ra diza'quë, nu nahia muzë shtë të parë guërë'tsë diza'quë entrë grë mënë. ²⁶Iurne' quëglua'a më lu ra shmënë më, lo quë más antsë nanú naga'chi. Ra mënë, nilë ra ianglë adë guc bé'adi'i rai' secretë narac bë'a hia'a iurne'. ²⁷Guc shtu'u më guëlua'a më lu shmënë më de quë por diza'quë, ra mënë nanádi'i më israelitë gac rall shini më, nu quëglua'a më quëbezënú Cristo lë'ë rall. Por Cristo naquëbezënú lë'ë rall tsuté rall lu gube'e. Ni na favurë ru'bë nabë'në më.

²⁸Lë'ë na'a quëglua'a na'a shti'dzë Cristo nu quëgtsëbë na'a mënë të gac rall firmë lu shnezë më. Quëglua'a na'a lu ra mënë con llni shtë Dios parë tsasë rall shti'dzë më. Rni'i na'a lu rall por gac unidë rall con Cristo gac rall mënë za'quë de verdá sin ni tubi faltë. ²⁹Quëhuna shchi'ni më con guëdubi fuersë narne'e Cristo. Mizmë lë'ë më rne'e zihani pudërë parë tsagla'ga lu shchi'ni më të gac mënë justë delantë lu Dios.

2 Rac shtua'a gac bë'a të de quë nalé quëhuna dchi'ni por

lë'ë të nu por grë ra naquërelde guë'dchi Laodicea nu por grë ra naganádi'i lua. ²Galëni'i ldua'a na zndë'ë; quëhuna parë gac rall firmë lu shti'dzë më nu parë gac shtu'u rall sa' rall más. Rac shtua'a de quë tsasë rall di'dzë nadë guënëdi'i mënë guahietë, perë iurne' sí, riasë rall shti'dzë Dios nu runguë bë'a rall Cristo. Llëru'bë na cusë ni. ³Por Cristo sulamëntë gac bë'a mieti llni shtë Dios. Por Cristo sulamëntë tsasë mieti verdá naná ziquë cusë nalasac. ⁴Cagnia'a lu të cusë ni të parë ni tubi adë chu cuguëdi'i lë'ë të con ra di'dzë narlua'a chulë perë falsë nahin. ⁵Pues aunquë nilë adë zúdia'a con lë'ë të, rëagná ldua'a lë'ë të. Nalé rquitë ldua'a; nanéa unidë na hia'a. Nanéa tsaldí ldu'u të shti'dzë Cristo con guëdubinú ldu'u të. Na të firmë con fe shtë të.

⁶Bë'në të recibir Cristo Jesús ziquë Dadë shtë të; por ni gulë guquërëldëru'u unidë con lë'ë më. ⁷Ziquë tubi hiaguë nanapë lu'chi za'quë u ziquë tubi hiu'u nanapë cimientë fuertë, gulë gac firmë lu shti'dzë më ziquë más antsë bësë'dë të. Nu gulë bédë'ë graci lu më guëdubi tiempë; gulë guni'iru'u dushquilli lu Dadë.

Vidë cubi narne'e Jesús

⁸Gulë gapë cuidadë të adë chu cuguëdi'i lë'ë të nu tsanaldë të enseñansë shtë rall. Caglua'a rall sulamëntë con lo quë narëalë guëc mënë. Caglua'a rall di'dzë falsë nanápëdi'i pudërë de acuerdë con custumbrë nu creenci shtë rall naná shgabë nguiu. Adë nápëdi'i rall llni shtë Cristo. ⁹Dios gúqui' nguiu; lë

më Jesucristo. Grë pudërë nu grë llni shtë Dios napë Jesucristo, ¹⁰nu lë'ë të rac bë'a të na të shini Dios. Por Jesucristo napë të mizmə vidë shtë Dios; adë runë fáltëdi'i. Na më primërë entrë grë ra nanapë pudërë nu entrë grë ra espíritu naná rnibë'a. ¹¹Por Cristo na të limpi delantë lu Dios. Bëdchisú më duldë shtë të. Gúquëdi'i të limpi por custumbrë shtë galriuguë cuerpë cumë runë mënë israelitë, sino Cristo bëzunéhi' almë shtë të. ¹²Bëriubë nisë të; bëga'chinú të Jesucristo nu zni guc resucitar të juntë con lë'ë më purquë gualdí ldu'u të pudërë shtë Dios, el quë nabëldishtë lë'ë Jesús ladi ra tēgulë. ¹³Antsë nápëdi'i të vidë shtë Dios, sino ziquë tēgulë guquëreldeñú të duldë; gadzé duldë la'ni ldu'u të, perë iurne' Dios bëcua'ni lë'ë të juntë con Cristo. Unidë na hia'a con lë'ë më. Bë'në më perdunë grë duldë shtë hia'a. ¹⁴Bëti'i Dios lo quë naná cuntrë lë'ë hia'a, grë lo quë nabëdé'na'a cuntrë lëy shtë më. Lëy ni bēdchi'bē demandë cuntrë lë'ë hia'a, perë bëti'i më grë demandë ni por galguti shtë Jesús. Bēdē'ë më fin grë demandë iurë guti Jesús lu cruz. ¹⁵Cristo bë'në gan lu grë nanapë pudërë nu lu grë el quë narnibë'a. Bia'a më ra narnibë'a ziquë nariá tubi prësi; ziazú rall lu desfilë parë guená mieti bë'në më gan lu rall. Iurë guti më lu cruz, bë'në më gan lu pudërë shtë rall.

**Gulë guc shtu'u lo quë
nanú lu gube'e**

¹⁶Por ni adë chu gunë juzguë lë'ë të por lo quë naráu të u lo

quë naruu' të. Adë chu gúnëdi'i juzguë lë'ë të por custumbrë shtë laní, si talë quëhunë të cumplir u adë quëhúnëdi'i të cumplir. Adë chu gúnëdi'i juzguë lë'ë të por lo quë naquëhúnël ra dzë narzi'i ldu'u mënë u ra dzë delicadë shtë laní. ¹⁷Grë ra cusë rē' na ziquë tubi figurë shtë naná guēdchini despuësë, u sea Cristo. ¹⁸Adë rsá'nēdi'i të ni tubi chu guēdchisú premi narac shtu'u Dios gapë të. Si talë guēni'i mënë lu të napë quë gunë të adorar ra ianglë u talë guēni'i rall napë quë cubēnebi të shti'dzë ra ianglë, adë tsaldídi'i ldu'u të shti'dzë rall. Grë mënë ni riutē rall cusë adë gunádi'i rall. Runë nadchini rall. Rianaldë rall tēchi llgabë mal; rialdí ldu'u rall cusë nanápēdi'i ni tubi prēbē. ¹⁹Adë rianáldēdi'i rall shnezë Cristo con fe naná firmë. Lē'ë më na më cabēsë shtë shmēnē më. Por lē'ë më grë ra naná rialdí ldu'i de verdá, na rai' ziquë partë shtë cuerpë; napë rai' vidë; runë alimentar rai' por lē'ë më; riaru'bē rai' por pudērë shtë më. Ndē'ë ze'dē de Dios.

²⁰Guti të juntë con Cristo; bë'në më parë adë gúnēru'udi'i të duldë. Por ni çpēzielú quērelde të ziquë los de más mēnē shtë guē'dchiliu? ÇPēzielú rianaldë të tēchi ra custumbrë nu rēglē shtë nguui? ²¹Rni'i mēnē: “Adē rgá'ldēdi'il ndē'ē” u rni'i rall: “Adē gáudi'il ndē'ē” u “Adē rná'zidi'il ndē'ē”. ²²Grētē' ra rēglē rē' napē quē tsalú, igual cumē los de más cusē tsalú rahin. Rēglē ni nadē más na rahin enseñansē nu lēy shtë mēnē. ²³Verdá rlu'a'a ra rēglē rē' ziquë cusē za'quē

purquë el quë narianaldë tëchi
cusë ni, quëzac zill el mizmë lë'ëll.
Voluntariamente quëhúnëll cumplir
con zihani devociuni. Rlua'a rall
ziquë mënë narunë cumplir cusë
durë, perë grëtë' ra custumbrë
rë' nápëdi'in pudërë parë guëzalú
deseo mal nananú la'ni ldu'u mënë.

3 Iurní rnia'a lu të, guc resucitar
të juntë con Cristo. Iurne' gulë
gudili lo quë naná ze'dë de Dios
catë quëbezë Jesucristo ladë ldi
shtë më. ²Gulë tsanaldë ra deseo
shtë më, lédëdi'i ra deseo mal
shtë mënë ³purquë guti të parë
cusë shtë guë'dchiliu; nabaninú
të Cristo nu lë'ë më nabaninú më
Dios. Vidë cubi nanapë të na ziquë
cusë naga'chi; napë tëhin por
Cristo. ⁴Nadáp'a'a vidë verdaderë
por Cristo. Iurë lë'ë më guëabri' lu
guë'dchiliu stubi, guziá hia'a parë
guëquërdëdnú hia'a lë'ë më catë
nidi'i fin, catë nanú pudërë nu llni
shtë më.

Vidë cubi

⁵Por ni gulë gudini grë cusë mal
la'ni ldu'u të. Adë chu gápëdi'i
stubi na'a, sulë tsé'li'. Gulë bës'a'në
grë cusë mal nanadë rluú'idi'i.
Adë tsaglá'guëdi'i të cusë dzabë
ziquë mal deseo nananú la'ni
ldu'u të. Adë rzébi'di'i ldu'u të
ra cusë shtë guë'dchiliu purquë
ni na idolatría; quëhúnëll adorar
ra cusë shtë guë'dchiliu. ⁶Por
grë ra cusë ni naquëhunë mënë
nanadë rzu'bë diáguëdi'i shti'dzë
më, guëshe'ldë më cashtigu dushë
guëc rall. ⁷Lë'ë të bënë të grë ra
cusë rë' iurë guquërdëdë të ziquë
ra nadë guënëdi'i Dios ⁸perë

rnia'a lu të, gulë bës'a'në grë duldë.
Adë rdé'ëdi'il lugar ldaguë llanë
la'ni ldú'ul. Adë chu guëldé'di'i lu
sáhi'. Adë rúnëdi'il vengar. Adë
rni'i guídzëdi'il guëc sa'l. Adë
chu guëní'idi'i di'dzë dzabë. ⁹Adë
chu guëní'idi'i bishi lu sáhi'. Gulë
bëdchisú grë ra cusë ni purquë hia
bës'a'në të mudë nanabani të antsë
con grë maldá. ¹⁰Na të mënë cubi
por pudërë shtë më. Dzë con dzë
rcubi shgabë të con llni shtë më;
quëac cambi të hashtë gac të ziquë
el quë nabëdë'ë vidë cubi parë lë'ë
të. ¹¹Pues lu Dadë Dios sulë Cristo
nasac. Adë rúnëdi'i importë si talë
nal më israelitë u adë nádi'il më
israelitë. Adë rúnëdi'i më casë
si bëriuguë cuerpë shtë'nël u adë
bëriúguëdi'in, u si nal më zitu u si
talë nal bajo ordë shtë stubi mënë,
u si talë nápël libertá. Tubsë cusë
nasac naná si talë runguë bé'al
Cristo.

¹²Rac shtu'u Dios lë'ë të nu gulë
më lë'ë të parë gac të mënë santu
delantë lu më. Por ni ziquë racu
mënë con shabë cubi, gulë gac
mënë narga'a ldu'u sáhi'; gulë gac
mënë humildë nu pacënci. Gulë gac
mënë za'quë lu sa' të. Gulë bënë
sirvë lu rall. ¹³Adë rié'dëdi'i të con
mudë nanabani sa'l, sino bënë
perdunë lë'ëll aunquë rdchí'bëll
demandë cuntrë lë'ël. Napë quë
gúnëll perdunë sa'l igual manërë
ziquë Dios bënë perdunë lë'ël.
¹⁴Más de ni gulë gapë llëru'bë amor,
purquë rqui'ni gac shtu'u sa'l parë
gac të unidë nu parë guëquërdëdnú
të sin dishi'bi. ¹⁵Gulë bënë'ë sí
cue'dchí Dadë Jesús ldu'u të; parë
ni gulë më lë'ë të parë gac të mënë

unidë ziquë cuerpë nanápëdi'i narunë molestë. Nu gulë bēdē'ë graci lu mē guēdubi tiempë.

¹⁶Gulë bēdē'ë sí tē guēnibē'a diza'quë shtë Cristo entrë lē'ë tē mientras quēglua'a tē sa' tē, mientras quēni'inú tē sa' tē con llini shtë Dios. Nu gulë bi'ldi lu Dios grē clasē cantē naná labansē parē Dios. Gulë bi'ldi lu mē con guēdubinú ldu'u tē. Gulë bēdē'ë graci lu mē.

¹⁷Cualquier cusē narunë tē u lo quē narni'i tē, gulë bē'nin sulē parē gunē mēnē alabar Dadē Jesús nu gulë bēdē'ë graci lu Dios, Shtáda'a, por lē shtē shini mē.

**Lo quē narunë tucarē
gunē ra shmēnē Dios**

¹⁸Lē'ë tē tsel'ë nguui, gulë bēzu'bē diaguē shti'dzē tsél'lēl purquē ni na narunë tucarē gunē tē ziquē shmēnē Dadē Jesús. ¹⁹Lē'ë tē nguui, gulë guc shtu'u tsél'lēl; adē runē nadúshēdi'i lu tsél'lēl. ²⁰Lē'ë tē llguē'nē, gulë bēzu'bē diaguē shti'dzē shtadē tē guēdubi tiempē purquē ni na lo quē narēuu' ldu'u Dios. ²¹Dadē nanapē shini, gulë gapē vidē za'quē delantē lu shínil tē adē tsasháquēdi'i ldu'u llguē'nē lu shnezē Dios. ²²Lē'ë tē narunē sirvē lu lamē, gulë bēzu'bē diaguē di'dzē shtē lamē, lēdē niá'asēdi'i iurē lē'ë lamē rna lu tē, sino gulë bē'nē sirvē lu rall guēdubinú ldú'ul. Napē quē guēa'nē tē bien lu lamē purquē zni guēlua'a de quē quēhunē tē rēspēti Dios de verdá. ²³Cualquier dchi'ni naquēhunē tē, gulë bē'nin con guēdubinú ldú'ul purquē quēhunē tē sirvē lu Dios, lēdē niá'asēdi'i lu mēnē. ²⁴Nanē tē de quē lē'ë Dadē

guēne'e mē tubi herenci ziquē premi ca'a tē purquē quēhunē tē sirvē lúhi'. ²⁵Perē el quē narunē mal, ni gúnēll recibir pagu mal por lo quē naquēhúnēll purquē lu Dios grē hia'a na igual. Gunē mē tratē igual grē mēnē.

4 Lē'ë tē lamē, gulë guc tē mēnē za'quē lu narunē dchi'ni. Gulë bē'nē tratē bien lē'ë rall purquē nanē tē lamē shtē tē, quēbézi' gube'e. ²Gulë tsagla'guē guēni'inú Dios nu gulë cue nasini. Gulë bēdē'ë graci lu Dios. ³Gulë guna'bē lu mē por lē'ë na'a ndē'ë tē parē guēne'e mē permisi lu na'a parē guadi'dzē na'a diza'quē. Gulë guna'bē lu mē tē parē gac guēlua'a na'a lu mēnē lo quē adē guēnēdi'i, de quē sulē Cristo napē pudērē parē gunē mē salvar mieti. Por diza'quē rē' nanúa prēsi ndē'ë. ⁴Gulë guna'bē lu mē parē gunē mē compa'ni na parē guēluá'ahia diza'quē tubi manērē clarē purquē zni runē tucarē.

⁵Gulë guquērelde za'quē lu ra nadē rialdidi'i ldu'i shti'dzē Jesús. Gulë bē'nē provēchē bien guēdubi tiempē parē gúnēl bien delantē lu rall. ⁶Ziquē iurē ria zedē guēc cumidē parē gapin sabor, gulë bēsa'nē de quē di'dzē shtē tē gaquin naza'quē, lédēdi'i di'dzē dzabē. Iurní gac bē'a tē lla mudē guadi'dzēnū tē sa' tē.

Lúltimē saludē nabēshe'ldē Pablo

⁷Tíquico naná bēchi narac shtu'u hia'a, guēni'ill lu tē cuendē shtē na. Tíquico nall el quē narunē compa'ni na lu shchi'ni mē. Nall tubi servidor za'quē shtē Dadē Jesús. ⁸Guēni'i Tíquico lu tē lla na na'a ndē'ë.

Quëgshe'lda lé'i' parë guëni'inull
lë'ë të parë gapë të más ánimo
lu shnezë më; su të más firmë
lu shnezë Dios. ⁹Nu guëshe'lda
Onésimo; gúnëll compa'ni Tíquico.
Onésimo na më ladzë të nu náhi'
servidor za'quë shtë Jesús. Nalé rac
shtu'u hia'a lé'i'. Guadi'dzë rai' lo
quë naná zuzac na ndë'ë.

¹⁰Aristarco el quë nananú
lachigui'bë con na, quëgshé'ldëll
saludë con Marcos, shprimi
Bernabé. Lë'ë të napë të ordë shtë
shcuendë Marcos. Si talë tsagué'nëll
visitar lë'ë të, gulë bë'në recibir lé'i'
con bien. ¹¹También Jesús nanapë
stubi léhi', Justo, quëgshé'ldëll
saludë parë lë'ë të. Entrë grë ra
mënë israelitë naná shmënë Jesús,
Aristarco, Marcos, nu Justo, na
rai' lúniquë nabë'në compa'ni na
parë guadi'dza shti'dzë Dios, di'dzë
narni'i lla tsuté mënë catë rnibë'a
Dios. Lë'ë rai' de vërë nalé bë'në rai'
compa'ni na. ¹²Epafras zac nall më
ladzë të; quëgshé'ldëll saludë. Náhi'
servidor shtë Jesucristo nu rúni'
ruëguë lu Dios siempër por lë'ë të

parë gac të firmë lu shnezë më nu
quëgná'bëll lu më con guëdubínú
ldú'ull de quë gac bë'a të voluntá
shtë më. Quëgná'bëll gunë të
cumplirin. ¹³Nahia testigu de quë
Epafras nalé bë'nëll dchi'ni parë
bien shtë të nu zac parë bien shtë ra
mënë naquërelde guë'dchi Laodicea
nu Hierápolis. ¹⁴Lucas lë'ë ducturë
narac shtu'u hia'a, con Demas,
rshe'ldë rai' saludë parë lë'ë të.

¹⁵Gulë bë'në saludar ra narialdí
ldu'i Jesús, ra naquërelde guë'dchi
Laodicea. Nu zac gulë bë'në saludar
Ninfas con grë ra nardëá lídchi'.

¹⁶Despuës de gu'ldë të cartë rë',
gulë bëshe'ldë mizme cartë parë ra
shmënë Dios naquërelde Laodicea.
Nu gulë bi'ldi cartë nabëshe'lda
lu ra mënë ni. ¹⁷Guni'i lu Arquipo
di'dzë rë': "Bë'në cumplir dchi'ni
nabëne'e Dadë parë gúnëll. Adë gac
nabéchidi'il lu voluntá shtë më."

¹⁸Na Pablo quëquëa'a tubi saludë
parë lë'ë të con prupi guiahia. Gulë
bësëagná ldu'u të con oraciuni shtë
të nanúa prësi. Dios gunë ldai' më
lë'ë të. Amén.